

CONVENIO DE COLABORACIÓN ENTRE A CONSELLERÍA DO MEDIO RURAL E O CONCELLO DE AGOLADA PARA A CONCESIÓN DUNHA AXUDA PARA A XESTIÓN DO CENTRO DE LIMPEZA E DESINFECCIÓN DE VEHÍCULOS DE TRANSPORTE NO SECTOR GANDEIRO

MEMORIA XUSTIFICATIVA

O director xeral de Gandaría, Agricultura e Industrias Agroalimentarias da Consellería do Medio Rural

DECLARA:

Que a Consellería do Medio Rural ten previsto formalizar co Concello de Agolada o instrumento convencional arriba referido por un período de vixencia que abrangue dende o 1 de xaneiro de 2018 ata o 31 de decembro 2021.

Que o instrumento convencional ten por obxecto establecer as condicións nas que se concederá unha axuda ao Concello de Agolada para conservar e explotar o centro de limpeza e desinfección de vehículos de transporte no sector gandeiro existente no dito concello.

Que existe converxencia de intereses entre as entidades asinantes en orden á consecución do obxecto referido.

Que o instrumento convencional que se pretende asinar se fundamenta no seguinte:

Os vehículos dedicados ao transporte por estrada no sector gandeiro constitúen un elemento importante dentro da produción e sanidade gandeira, supoñendo os seus desprazamentos un risco na difusión e propagación das enfermidades infecto-contaxiosas dos animais. Deste xeito, a limpeza e desinfección de vehículos utilizados para o transporte de animais adquire gran importancia sanitaria.

A Comunidade Autónoma de Galicia é orixe e destino de numerosos intercambios comerciais de animais vivos e produtos de orixe animal, especialmente con diferentes rexións españolas, e tamén con diversos países da Unión Europea, sendo esta actividade fundamental no mantemento da economía rural galega, ata o punto de que a aparición e propagación de calquera das enfermidades animais obxecto de restricións nos movementos de animais ou produtos terían importantes repercusións económicas sobre todo o sector gandeiro.

Determinadas enfermidades transmisibles dos animais poden ter significativas repercusións na saúde pública e na seguridade alimentaria, polo que resulta fundamental dende o punto de vista da saúde humana tomar todas as medidas necesarias para evitar a súa aparición e, no seu caso, difusión.

Unha das prioridades da Consellería do Medio Rural e da Xunta de Galicia é manter a actividade agropecuaria, como medida para fixar poboación no rural e evitar o despoboamento, polo que é imprescindible adoptar todas as actuacións que aseguren a sanidade animal, fortalecendo a rendibilidade das producións gandeiras.



A Lei 5/1997, do 22 de xullo, da Administración local de Galicia, atribúelle aos concellos competencias, nos termos establecidos pola normativa estatal e autonómica, en materia de abastos, matadoiros, feiras, mercados e defensa dos usuarios e consumidores; protección medio ambiental e da salubridade pública.

A Comarca de Agolada é unha zona de intensa actividade agropecuaria, resultando evidente o interese do Concello de Agolada por manter e fomentar as actividades gandeiras, contribuír á súa rendibilidade económica, fixar poboación e asegurar a saúde pública.

A Lei 9/2007, do 13 de xuño, de subvencións de Galicia, prevé a concesión directa de subvencións cando se acrediten razóns de interese público, social ou económico. No mesmo senso, exprésase o artigo 36.c do Decreto 11/2009, do 8 de xaneiro, polo que se aproba o regulamento da lei. Por outra parte, o artigo 40.1 do mesmo decreto regula a concesión de subvencións directas mediante convenio, nos casos en que se acrediten razóns de interese público, social ou económico.

Tendo en conta o evidente interese público, social e económico da actividade, a Consellería do Medio Rural e o concello de Agolada veñen colaborando dende hai anos no mantemento deste servizo, para deste xeito contribuír a evitar a difusión e propagación das enfermidades infecto-contaxiosas dos animais.

O desenvolvemento destas actuacións no ámbito xeográfico deste concello so é posible coa participación da Administración Local de Agolada, xa que ante a ausencia total de iniciativa privada neste campo, é a única entidade que conta co persoal necesario, así como experiencia na xestión do centro. Nestas condicións o procedemento ordinario de concorrencia competitiva na concesión de subvencións resulta improcedente, por canto a entidade destinataria resulta imprescindible para acadar os obxectivos perseguidos.

Que os intereses converxentes das partes asinantes exclúen o ánimo de lucro e non poden satisfacerse axeitadamente mediante a celebración dun contrato dos contemplados na Lei 9/2017, do 8 de novembro, de Contratos do Sector Público, pola que se transpóñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de febreiro de 2014, ou doutro instrumento alleo á natureza estritamente convencional.

En atención ao exposto e a fin de dar cumprimento ao preceptuado no artigo 15.2 da Lei 1/2016, de 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.

O director xeral de Gandaría, Agricultura e Industrias Agroalimentarias

Asinada dixitalmente,  
Silvestre José Balseiros Guinarte

